

Pravilnik o postupku dodjele ugovora o uslugama iz Aneksa II. Dio B ZJN i Pravilnik o uslovima i načinu korištenja e-aukcije ("SGBiH" broj 66/16)

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), člana 8. stav (2) a u vezi sa članom 92. Stav (7) Zakona o javnim nabavkama ("Službeni glasnik BiH", broj 39/14) Vijeće ministara Bosne i Hercegovine, na prijedlog Agencije za javne nabavke Bosne i Hercegovine, uz prethodnu saglasnost Odbora Agencije za javne nabavke Bosne i Hercegovine, na 67. sjednici održanoj 01.08.2016. godine, donijelo je

PRAVILNIK O POSTUPKU DODJELE UGOVORA O USLUGAMA IZ ANEKSA II. DIO B ZAKONA O JAVNIM NABAVKAMA

DIO PRVI - OPĆE ODREDBE

Član 1.

(Predmet Pravilnika)

(1) Ovim Pravilnikom propisuje se način provođenja postupka javne nabavke čiji su predmet usluge nabrojane u Aneksu

II. Dio B Zakona o javnim nabavkama ("Službeni glasnik BiH", broj 39/14) (u daljem tekstu: Zakon).

(2) Za dodjelu ugovora iz člana 1. ovog pravilnika ugovorni organ iz čl. 4. i 5. Zakona provodi postupak propisan ovim Pravilnikom.

(3) Za nabavku usluga iz Aneksa II. Dio B, ugovorni organ iz čl.4. i 5. Zakona (u daljem tekstu: ugovorni organ), može provesti i jedan od postupaka javne nabavke, definisanih u Poglavlju V Zakona, kada je procijenjena vrijednost nabavke u skladu sa članom 87. stav (2) i (3) Zakona.

(4) U slučaju iz stava (3) ovog člana, ne primjenjuju se odredbe ovog Pravilnika.

Član 2.

(Upotreba muškog ili ženskog roda)

Izrazi koji su radi preglednosti dati u jednom gramatičkom rodu u ovom Pravilniku se bez diskriminacije odnose na muškarce i žene.

Član 3.

(Usluge koje nisu navedene u Aneksu II. Dio A i C Zakona)

Ostale usluge, koje nisu usluge iz Aneksa II. Dio A i Dio C Zakona, su usluge iz Aneksa II. Dio B i na te usluge se primjenjuje ovaj Pravilnik.

Član 4.

(Opći principi)

(1) Pri dodjeli ugovora za nabavku usluga koje su predmet ovog pravilnika, ugovorni organ mora poštovati principe iz

člana 3. stav (1) Zakona.

(2) Ugovorni organ u provođenju postupka nabavke usluga iz Aneksa II. Dio B evidentira sva postupanja u svrhu dokumentovanja poštivanja principa transparentnosti.

(3) Prilikom nabavke usluga iz Aneksa II. Dio B ugovorni organ može izabrati više ponuđača za predmetnu uslugu, iz iste kategorije, za period za koji provodi postupak nabavke.

Član 5.

(Period trajanja ugovora)

(1) Ugovor za usluge iz člana 1. ovog Pravilnika može se zaključiti za jednokratno izvršenje određene usluge ili

sukcesivno za period koji ne može biti duži od četiri godine.

(2) Ako se ugovor dodjeljuje na period do četiri godine, obaveze koje dospijevaju u narednim godinama moraju biti

ugovorene u iznosima predviđenim propisima kojima se uređuje izvršenje budžeta ili finansijskog plana za svaku

godinu posebno.

DIO DRUGI - PRIPREMA TEHNIČKE SPECIFIKACIJE

Član 6.

(Tehničke specifikacije)

(1) Ugovorni organ priprema tehničke specifikacije u skladu s članom 54. Zakona, pri čemu obavezno koristi referentni

broj Jedinstvenog rječnika javne nabavke (JRJN).

(2) Ukoliko je predmet javne nabavke složen ili ima posebnu svrhu, ugovorni organ može zahtijevati provjeru tehničke

sposobnosti ponuđača i opremu za testiranje i istraživanje, te sredstva za osiguranje kvaliteta.

(3) Za nabavke usluga iz Aneksa II. Dio B ugovorni organ može osnovati komisiju u skladu sa odredbama Pravilnika o

uspostavi i radu komisije za nabavke ("Službeni glasnik BiH" broj 103/14).

(4) U provođenju postupka nabavke usluga iz Aneksa II. Dio B, ugovorni organ poštuje princip povjerljivosti, u skladu sa članom 11. Zakona.

DIO TREĆI – UČEŠĆE

Član 7.

(Početak postupka)

(1) Ukoliko nabavka usluge iz Aneksa II. Dio B nije u planu nabavki ugovornog organa, ugovorni organ donosi odluku o

dopuni plana nabavki, i to na način da nabavku predstavlja u ukupnom iznosu za tekuću godinu.

(2) Postupak nabavke usluga iz Aneksa II. Dio B, ugovorni organ pokreće odlukom iz člana 18. Zakona o javnim

nabavkama (u daljem tekstu:Zakon).

(3) Ugovorni organ priprema poziv, koji mora biti objavljen na web stranici ugovornog organa najmanje 14 dana, te isti

uputiti na najmanje tri adrese.

(4) Poziv obavezno sadrži slijedeće elemente:

a) naziv ugovornog organa;

b) opis predmeta nabavke i tehničke specifikacije koja sadrži minimum zahtjeva na osnovu kojih potencijalni

ponuđač ili ponuđači mogu dati ponudu;

c) procjenjenu vrijednost nabavke za jednokratnu nabavku, a u slučaju da se radi o sukcesivnoj nabavci, procjenjenu vrijednost za period tokom kojeg će nabavljati predmetu uslugu;

d) kriterij za dodjelu ugovora, ukoliko je primjereno;

e) Izjavu iz člana 52. stav (2) Zakona, ukoliko je primjereno;

f) način dostavljanja ponude;

g) adresu na koju se ponuda dostavlja;

h) da li se ugovor za usluge zaključuje za jednokratno izvršenje određene usluge ili na period koji ne može biti duži od četiri godine;

i) krajnji rok za dostavu ponuda (datum, mjesto i vrijeme);

j) kontakt osobu, broj telefona i adresu elektronske pošte.

Član 8.

(Provjera kvalifikacije ponuđača)

(1) Ugovorni organ može zahtijevati dokaz iz člana 45. i 46. Zakona, ukoliko je primjereno predmetu i vrijednosti nabavke.

(2) Ugovorni organ može se odlučiti za dodatne uslove u pogledu ekonomsko-finansijske sposobnosti iz člana 47.

Zakona, te tehničke i profesionalne sposobnosti iz čl. 48. i 50. Zakona, isti moraju biti u skladu s članom 44. stav (3)

Zakona, odnosno moraju biti minimalni, srazmjerni i u vezi s predmetom nabavke, te je dužan propisati dokaze koji se

traže u cilju utvrđivanja ispunjenosti uslova, a dokazi moraju biti u skladu s postavljenim uslovima.

DIO ČETVRTI- PROVOĐENJE PREGOVORA I EVALUACIJA

Član 9.

(Provođenje pregovora)

(1) Ugovorni organ može u pozivu za dostavu ponuda predvidjeti pregovaranje, koje se provodi nakon prijema ponude.

(2) Ukoliko je ugovorni organ predvidio pregovaranje, obavezan je imenovati komisiju za nabavku.

(3) Predmeti pregovora su: način izvršenja, posebnosti tehničke specifikacije, mogući rizici i kritične tačke u procesu

izvršenja, cijena, uslovi izvršenja na osnovu navedenih zahtjeva i druge teme za pregovore koji su u vezi s

predmetom usluga i njihovim izvršenjem.

(4) Ukoliko je poziv za dostavu ponude upućen na više ponuđača, redosljed ponuđača za pregovore ugovorni

organ unaprijed određuje redosljedom podnošenja prijave ili početnih ponuda.

(5) Ukoliko je ugovorni organ predvidio pregovore, pregovori se provode na slijedeći način:

a) komisija za nabavke priprema spisak pitanja koja će postaviti ponuđačima u toku pregovora;

b) ponuđači su shodno tome pozvani na učešće u pregovorima;

c) u svakom krugu pregovora svim ponuđačima se postavljaju ista pitanja;

d) zapisnici se pripremaju za svaki krug pregovora i potpisuju ih svi članovi komisije za nabavke;

e) prijedlozi i sporazumi do kojih se došlo sa svakim ponuđačem se bilježe u posebnim izvještajima koje

potpisuju članovi komisije za nabavke i ponuđač;

f) broj krugova pregovora i kraj pregovora se određuje u završnom zapisniku komisije za nabavke;

g) zapisnici svakog kruga pregovora sa svakim ponuđačem su na raspolaganju ponuđaču kojeg se tiču i predstavnicima ugovornog organa;

h) u bilo kojoj fazi procesa pregovora, komisija za nabavke može zahtijevati podatke od ponuđača i dalje

dokaze u vezi sa pojedinostima navedenim u početnoj ponudi. Ponuđačima se ostavlja razuman rok za

dostavu pojašnjenja;

i) komunikacija komisije za nabavke i ponuđača je u pismenoj formi.

(6) Ugovorni organ može predvidjeti i dostavljanja konačnih ponuda.

Član 10.

(Ocjena ponuda)

(1) Ugovorni organ može donijeti odluku o izboru najpovoljnijeg ponuđača za nabavku usluge na osnovu

dostavljenih ponuda, ako je primjereno.

(2) Ukoliko se ponuda zasniva na utvrđenoj tarifi, ugovorni organ donosi odluku o izboru

najpovoljnijeg ponuđača za

nabavku usluge, u skladu sa zahtjevima iz poziva za dostavu ponuda.

(3) Ako je ugovorni organ predvidio vođenje pregovora, odluku o izboru najpovoljnijeg ponuđača za nabavku usluge

donosi nakon okončanja pregovora.

DIO ŠESTI - EX ANTE OBAVJEŠTENJE I PROCES PODNOŠENJA ŽALBI

Član 11.

(Dobrovoljno ex ante obavještenje o transparentnosti)

Ugovorni organ, istovremeno sa slanjem odluke o izboru izabranom ponuđaču, može objaviti

dobrovoljno ex ante

obavještenje na Portalu javnih nabavki, u skladu s članom 36. Zakona.

Član 12.

(Pravna zaštita)

Postupak pravne zaštite provodi se u skladu s odredbama Trećeg dijela Zakona - Pravna zaštita.

DIO SEDMI - OBJAVA OBAVJEŠTENJA O DODJELI UGOVORA

Član 13.

(Obavještenje o dodjeli ugovora)

Ugovorni organ objavljuje obavještenje o dodjeli ugovora u postupku nabavke usluga iz člana 1. ovog pravilnika u skladu s članom 74. stav (2) Zakona.

ZAVRŠNE ODREDBE

Član 14.

(Prelazne odredbe)

Svi postupci nabavke koji su započeti će se okončati u skladu sa odredbama pravilnika koji je važio u momentu

pokretanja postupka nabavke usluga iz Aneksa II. Dio B.

Član 15.

(Prestanak važenja)

Stupanjem na snagu ovog Pravilnika prestaje da važi Pravilnik o postupku dodjele ugovora o uslugama iz Aneksa II.

Dio B Zakona o javnim nabavkama ("Službeni glasnik BiH", broj 104/14).

Član 16.

(Stupanje na snagu)

Ovaj Pravilnik stupa na snagu osmog dana od dana objavljivanja u "Službenom glasniku BiH".

VM broj 169/16

01. augusta 2016. godine

Sarajevo

Predsjedavajući

Vijeća ministara BiH

Dr. **Denis Zvizdić**, s. r.

Na osnovu člana 123. stav (2) Zakona o javnim nabavkama ("Službeni glasnik BiH", broj 39/14) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), na prijedlog Agencije za javne nabavke Bosne i Hercegovine, Vijeće ministara Bosne i Hercegovine, na 65. sjednici održanoj 21. jula 2016. godine, donijelo je

PRAVILNIK O USLOVIMA I NAČINU KORIŠTENJA E-AUKCIJE

Član 1.

(Predmet i definicija)

(1) Ovim pravilnikom se uređuju uslovi i način korištenja eaukcije u postupku dodjele ugovora putem otvorenog i

ograničenog postupka, pregovaračkog postupka sa objavom obavještenja o nabavci i konkurentskog zahtjeva za dostavu ponuda, u skladu sa kriterijima za dodjelu ugovora iz člana 64. Zakona o javnim nabavkama ("Službeni glasnik BiH", broj 39/14) - u daljem tekstu: Zakon.

(2) E-aukciju je moguće koristiti i prilikom ponovnog takmičenja za dobavljače sa kojima je zaključen okvirni

sporazum iz člana 32. stav (5) tačka b) Zakona i u sistemu kvalifikacije.

(3) E-aukcija je način provođenja dijela postupka javne nabavke, koji uključuje podnošenje novih cijena, izmijenjenih

naniže, ili cijena i novih (poboljšanih) vrijednosti koje se odnose na određene elemente ponuda, a odvija se

nakon početne ocjene ponuda i omogućava njihovo rangiranje pomoću automatskih metoda ocjenjivanja u

informacionom sistemu e-Nabavke (u daljem tekstu: sistem e-Nabavke).

Član 2.

(Uslovi za primjenu e-aukcije)

(1) E-aukcija je moguća ako:

a) su korisnici registrovani i aktivirani u sistemu e-Nabavke i posjeduju informatičku opremu i nesmetan

pristup sistemu e-Nabavke;

b) je predviđena u obavještenju o nabavci i tenderskoj dokumentaciji;

c) je tenderska dokumentacija objavljena u sistemu e-Nabavke.

(2) U slučaju primjene e-aukcije, tenderska dokumentacija mora sadržavati odgovarajuće informacije o procesu eaukcije

i podkriterije koji će biti predmet e-aukcije, pod uslovom da se ti podkriteriji mogu kvantitativno odrediti i

izraziti u brojevima ili postocima, odnosno kroz matematičku formulu, u slučaju primjene kriterija ekonomski

najpovoljnija ponuda. U slučaju kriterija ekonomski najpovoljnija ponuda, ocjena ponuda se vrši samo po

podkriterijima definisanim u sistemu e-Nabavke.

(3) E-aukcija nije moguća ukoliko su predmet nabavke ugovori o uslugama i ugovori o radovima čiji je predmet

intelektualni rad, kao što je projektovanje radova, jer se takve ponude ne mogu rangirati primjenom metoda

automatskog elektronskog ocjenjivanja.

Član 3.

(Unos i ocjena prihvatljivih ponuda)

(1) Prije zakazivanja e-aukcije ugovorni organ u sistem e-Nabavke unosi sve prihvatljive ponude.

(2) U slučaju da domaća ponuda ispunjava uslove za primjenu preferencijalnog tretmana domaćeg, ugovorni organ unosi stvarnu vrijednost ponude, s tim da prilikom unosa ponude u sistemu označava primjenu preferencijalnog tretmana domaćeg.

(3) U slučaju prijema jedne prihvatljive ponude e-aukcija se ne može zakazati, nego se postupak okončava u skladu sa članom 69. Zakona.

(4) U slučaju ekonomski najpovoljnije ponude podkriteriji koji se koriste u e-aukciji, prethodno moraju biti korišteni u početnoj ocjeni ponuda u postupku javne nabavke.

(5) Jedinica mjere u kojoj su iskazani elementi ponude koja se koristi za računanje broja bodova kod e-aukcije za podkriterije u okviru kriterija ekonomski najpovoljnije ponude mora biti iskazana na istoj osnovi za sve prihvatljive ponude.

Član 4.

(Zakazivanje i početak e-aukcije)

(1) Za zakazivanje i početak e-aukcije referentno je vrijeme u sistemu e-Nabavke.

(2) Ugovorni organ određuje početak i dužinu trajanja e-aukcije u sistemu e-Nabavke.

(3) Od momenta zakazivanja do vremena početka e-aukcije mora proći minimalno 48 sati.

(4) E-aukcija ne može početi vikendom, neradnim danom i radnim danom prije 9:00 sati i nakon 15:00 sati.

(5) U slučaju podjele postupka nabavke na lotove, e-aukcija se zakazuje za svaki lot posebno i ne može se zakazati početak za više od dvije aukcije u istom satu.

(6) Svi ponuđači koji su podnijeli prihvatljive ponude, momentom zakazivanja e-aukcije obavještavaju se istovremeno putem sistema e-Nabavke o slijedećem:

a) datumu i vremenu početka e-aukcije,

b) prethodno određenom trajanju e-aukcije;

c) broju postupka javne nabavke i broju lota, ukoliko je postupak podijeljen na lotove;

d) poziciji na rang listi u početnoj ocjeni ponuda;

e) ukupnom broju bodova u slučaju ekonomski najpovoljnije ponude;

f) da li se na ponudu primjenjuje preferencijalni tretman domaćeg.

Član 5.

(Trajanje, tok i završetak e-aukcije)

(1) Prilikom zakazivanja e-aukcije predviđeno trajanje je od minimalno 10 do maksimalno 30 minuta. Istekom

predviđenog trajanja e-aukcija se završava. E-aukcija se automatski produžava za dvije minute, ukoliko se podnese

nova cijena ili vrijednost u posljednje dvije minute trajanja e-aukcije. Ukoliko u posljednje dvije minute trajanja e-aukcije

ne bude podnesena nova cijena ili vrijednost, e-aukcija se završava istekom te dvije minute.

(2) U toku trajanja e-aukcije učesnicima e-aukcije su u svakom momentu trajanja e-aukcije vidljivi slijedeći podaci:

a) trenutna rang lista, bez otkrivanja identiteta ponuđača koji su učesnici e-aukcije;

b) cijene svih ponuda, u slučaju kriterija najniža cijena;

c) ukupan broj bodova svih ponuda, u slučaju kriterija ekonomski najpovoljnija ponuda;

d) ponude koje su umanjene za preferencijalni faktor;

e) vrijeme koje je ostalo do završetka e-aukcije;

f) raspon u kojem je moguće snižavati cijenu, u skladu sa članom 8. stav (1) ovog pravilnika.

Član 6.

(Rok za izmjenu i otkazivanje e-aukcije)

(1) Izmjenu vremena početka i dužine trajanja e-aukcije ugovorni organ može vršiti kroz sistem e-Nabavke do

momenta početka e-aukcije. Od momenta izmjene do novog početka e-aukcije mora proći minimalno 48 sati.

(2) Otkazivanje e-aukcije se može vršiti kroz sistem e-Nabavke do momenta početka e-aukcije.

(3) U slučaju iz stava (2) ovog člana, ugovorni organ je dužan unijeti razlog otkazivanja e-aukcije. Član 7.

(Obaveze i odgovornosti Agencije za javne nabavke BiH)

(1) U slučaju problema koji se dese isključivo u okruženju za koje je nadležna Agencija za javne nabavke BiH (u daljem

tekstu: Agencija), a usljed kojih dođe do nemogućnosti početka zakazane e-aukcije ili prekida započete e-aukcije,

Agencija ponovo zakazuje e-aukciju.

(2) Kada je potrebno ponovo zakazati e-aukciju u skladu sa stavom (1) ovog člana ugovorni organ je dužan obratiti se

Agenciji zahtjevom u kojem je opisan problem koji se desio.

(3) Ponovno zakazivanje e-aukcije u slučaju iz stava (1) ovog člana, koja nije započeta u zakazano vrijeme, se vrši

unošenjem inicijalnih vrijednosti, a ponovno zakazivanje prekinute e-aukcije se vrši sa posljednjim vrijednostima

koje je sistem zabilježio prije prekida.

(4) Agencija može ponovo zakazati e-aukciju i u drugim opravdanim slučajevima.

(5) U slučaju ponovnog zakazivanja e-aukcije iz stava (4) ovog člana, ugovorni organ je dužan dostaviti Agenciji zahtjev za ponovno zakazivanje e-aukcije, sa obrazloženjem razloga koji dokazuju da se radi o opravdanom slučaju. Agencija

utvrđuje postojanje opravdanih slučajeva najkasnije u roku od pet dana od dana prijema zahtjeva i o tome obavještava ugovorni organ.

(6) Zahtjev iz st. (2) i (5) ovog člana, za ponovno zakazivanje e-aukcije, mora sadržavati minimalno podatke o ugovornom

organu i broju postupka u kojem se ponavlja e-aukcija, te broju lota ukoliko je postupak podijeljen na lotove.

(7) Prilikom ponovnog zakazivanja e-aukcije predviđeno trajanje je jednako prvobitno predviđenom trajanju e-aukcije.

(8) U slučaju problema koji su se desili u okruženju za koje su odgovorni učesnici u e-aukciji, a usljed kojih je došlo do

nemogućnosti učestvovanja u e-aukciji, Agencija nezakazuje ponovo e-aukciju.

Član 8.

(Snižavanje cijena)

(1) Svako snižavanje cijene ponude u slučaju najniže cijene, kao kriterija za dodjelu ugovora, je moguće u rasponu od

0,1 % do 10 % najniže početne cijene svih ponuda.

(2) Svako snižavanje cijene ponude u slučaju ekonomski najpovoljnije ponude, kao kriterija za dodjelu ugovora, je

moguće u rasponu od 0,1 % do 10 % ponuđene cijene.

(3) Kada se ukupna cijena odnosi na tehničku specifikaciju koja se sastoji od više pozicija tada se svaka od pozicija

umanjuje za isti procenat koliko iznosi konačno procentualno umanjenje ukupne cijene postignute nakon e-aukcije, te

se na tako umanjene cijene nudi zaključenje ugovora najpovoljnijem ponuđaču u skladu sa članom 72. Zakona.

Član 9.

(Obavještenje o završetku e-aukcije)

(1) Sistem e- Nabavke šalje obavještenje o završenoj e-aukciji, u skladu sa članom 5. stav (1) ovog pravilnika.

(2) Ugovorni organ po završetku e-aukcije, u skladu sa članom 69. Zakona donosi odluku o prestanku postupka javne

nabavke i obavještava ponuđače u skladu sa članom 71. Zakona.

Član 10.

(Obaveznost provođenja e-aukcije)

(1) Za postupke javne nabavke iz člana 1. stav (1) ovog pravilnika, kod kojih se koristi najniža cijena kao kriterij za

dodjelu ugovora, ugovorni organi su dužni predvidjeti provođenje e-aukcije u sistemu e-Nabavke za najmanje:

a) 30% postupaka javne nabavke u 2017. godini.

b) 50% postupaka javne nabavke u 2018. godini.

c) 80% postupaka javne nabavke u 2019. godini.

(2) Od 01.01.2020. godine ugovorni organi su dužni za sve postupke javne nabavke iz člana 1. stav (1) ovog pravilnika,

kod kojih se koristi najniža cijena kao kriterij za dodjelu ugovora, predvidjeti provođenje e-aukcije u sistemu e-

Nabavke.

Član 11.

(Stupanje na snagu)

Ovaj pravilnik stupa na snagu osmog dana od dana objavljivanja u "Službenom glasniku BiH".

VM broj 171/2016

21. jula 2016. godine

Sarajevo

Predsjedavajući

Vijeća ministara BiH

Dr. **Denis Zvizdić**, s. r.